

REPUBLIKA E KOSOVES  
KOMUNA LIPJAN  
REPUBLIKA KOSOVO  
OPSTINA LIPLJAN

KOMPANIA RAJONALE UJESJELLESIT SH.A.  
REGIONAL WATER COMPANY J.S.C.  
REGIONALNA KOMPANIJA ZA VODOSNABEVANJE D.O.O.  
**PRISHTINA**  
PRISHTINE  
Nr. 1474 Dt. 10-06-2022

Pranuar me: Primljeno:	10.06 20 22		
Mesia Jednicat	Numri Broj	Shtojca Dodatak	
1-352/03	-30260		



KOMUNA E LIPJANIT



KOMPANIA RAJONALE UJESJELLESIT SH.A.  
REGIONAL WATER COMPANY J.S.C.  
REGIONALNA KOMPANIJA ZA VODOSNABEVANJE D.O.O.  
**PRISHTINA**

MARRËVESHJE SHËRBIMI  
PËR  
SHËRBIMET E UJËSJELLËSIT DHE UJËRAVE TË NDOTURA

në mes të:

**KOMUNËS SË LIPJANIT**  
dhe

**KOMPANISË RAJONALE TË UJËSJELLËSIT "PRISHTINA"SH.A.**

Kjo Marrëveshje Shërbimi (në tekstin e mëtutjeshëm: "Marrëveshje") është bërë më datë 10.06.2022 nga dhe në mes të **Komunës së Lipjanit** (në tekstin e mëtutjeshëm: "Komuna") dhe **Kompanisë Rajonale të Ujësjellësit "Prishtina" sh.a.** (në tekstin e mëtutjeshëm: "KRUP") me seli në Prishtinë në Rr. Hazir Shala, Nr. 4.

Komuna dhe KRUP, në tekstin e mëtutjeshëm referohen bashkërisht si "Palët".

## **PJESA HYRËSE**

DUKE PASUR PARASYSH SE:

KRUP është pronare e aseteve që shërbejnë për furnizimin me ujë dhe për ofrimin e shërbimeve të ujërave të ndotura dhe rrjedhimisht përgjegjëse për operimin, mirëmbajtjen, përtëritjen dhe zgjerimin e këtyre aseteve,

Me *Ligjin për Vetëqeverisje Lokale*, Komuna ka kompetenca ekskluzive për ofrimin e shërbimeve publike të furnizimit me ujë dhe shërbimet e kanalizimit të ujërave të ndotura,

Me *Ligjin për Ndërmarrje Publike* KRU-të janë Ndërmarrje Publike në pronësi të Republikës së Kosovës mbi të cilat të drejtat e aksionarit i ushtron Qeveria e Kosovës,

Me *Ligjin për Rregullimin e Shërbimeve të Ujit*, është përcaktuar që shërbimet e ujësjellësit dhe ujërave të ndotura mund të ofrohen vetëm nëse ofruesi i shërbimeve posedon licencë të shërbimit të lëshuar nga Autoriteti Rregullator për Shërbime të Ujit,

Është në interesin publik që t'i jipet KRUP e drejta ekskluzive për ofrimin e shërbimeve të ujësjellësit dhe kanalizimit brënda territorit të Komunës,

Bashkëpunimi efektiv dhe koordinimi i aktiviteteve ndërmjet Komunës dhe KRUP është i domosdoshëm për ofrimin e shërbimeve cilësore të furnizimit me ujë dhe kanalizimit në tërë territorin e komunës në pajtim me legjislacionin e zbatueshëm,

Kjo Marrëveshje ka për qëllim që të definojë të drejtat dhe obligimet e KRUP lidhur me operimin e aseteve të sistemit të ujësjellësit dhe ujërave të zeza që i shërbejnë Komunës, dhe që të definojë të drejtat dhe obligimet e Komunës në ofrimin e ndihmës për KRUP në arritjen e objektivave të saj,

Komuna dhe KRUP merren vesh si vijon:

### **Neni 1 Përkufizimet**

Për qëllimet e kësaj Marrëveshje, fjalët dhe shprehjet në vazhdim do ta kenë kuptimin si vijon:

**"Autorizim"** nënkupton të drejtën ekskluzive të cilën Komuna ia jep KRUP për ofrimin e shërbimeve të ujësjellësit dhe ujërave të zeza në territorin e Komunës;

**"Datë efektive"** nënkupton datën e hyrjes në fuqi të kësaj Marrëveshje;

**“Kërkesë ligjore”** nënkupton të gjitha ligjet, aktet nënligjore, urdhëresat, licencat, lejet, dhe rregullat në fuqi të nxjerra nga institucionet kompetente që kanë juridikcion mbi çështjen në fjalë;

**“Kohëzgjatje”** nënkupton afatin e aplikueshmërisë së kësaj Marrëveshje;

**“Ngjarje Forcë Madhore”** nënkupton çdo ngjarje që ndodhë përtej kontrollit të arsyeshëm të KRUP e që i shkakton asaj vonesa apo pengesa në përmbushjen e detyrimeve të saj sipas kësaj Marrëveshje; rastet e Forcës Madhore përfshijnë fatkeqësitë natyrore apo fatkeqësitë tjera të përkufizuara me Ligjin për Fatkeqësitë Natyrore dhe Fatkeqësitë Tjera.

**“NJPM të NP”** nënkupton Njësinë për Politika dhe Monitorim të Ndërmarrjeve Publike e themeluar me Ligjin për Ndërmarrjet Publike;

**“Rregullatori”** nënkupton Autoritetin Rregullator për Shërbime të Ujit;

**“Shërbimet e ujërave të ndotura”** nënkupton grumbullimin, bartjen, trajtimin dhe shkarkimin e ujërave të ndotura të përdorura nga shfrytëzuesit shtëpiak, komercial, industrial dhe publik;

**“Shërbimet e ujësjellësit”** nënkupton marrjen, trajtimin dhe distribuimin e ujit për konsum njerëzor si dhe operimin e rrjetit dhe objekteve që përdoren për këtë qëllim;

**“Standardet e shërbimit”** nënkupton secilin standard të aplikueshëm për shërbimet e ujësjellësit dhe ujërave të zeza të përcaktuar në pajtim me Ligjin për Rregullimin e Shërbimeve të Ujit dhe aktet nënligjore të miratuara nga Rregullatori në pajtim me këtë Ligj;

**“Tarifat e shërbimit”** nënkupton çdo ngarkesë apo tarifë e cila është miratuar nga Rregullatori me të cilën KRUP i ngarkon konsumatorët për shërbimet e ofruara;

**“Zona e shërbimit”** nënkupton komunat në të cilat KRUP ofron shërbimet e ujësjellësit dhe ujërave të zeza;

## **Neni 2**

### **Dhënia e të drejtës ekskluzive**

Komuna, me këtë Marrëveshje, i jep të autorizimin KRUP dhe të drejtën ekskluzive që gjatë afatit të kësaj Marrëveshje të ofrojë Shërbimet e Ujësjellësit dhe Shërbimet e Kanalizimit të Ujërave të Ndotura në tërë territorin e Komunës

1. Dhënia nga Komuna e të drejtës ekskluzive KRUP nënkupton që KRUP të operojë në pajtim me ligjet e aplikueshme, duke pasur parasysh si vijon:
  - 1.1 KRUP duhet të operojë me objektet dhe pajisjet e saj që i shfrytëzon për ofrimin e shërbimeve në pajtim me praktikën e mira për shërbimet publike. KRUP duhet të ofrojë shërbime të sigurta, të cilësisë së duhur dhe jo-diskriminuese në asnjë aspekt, dhe poashtu të bëjë përmirësimet, ngritjen e kapaciteteve trajtim, në përputhje me rritjen e konsumatorëve sipas nevojës;
  - 1.2 Në rast të ndonjë ngjarje Forcë Madhore, Palët do të bashkëpunojnë në përpjekje që të krijohen mundësi për ofrimin e shërbimeve të sigurta dhe të vazhdueshme për të gjithë konsumatorët konfrom situatës së krijuar.

2. Shërbimet e operimit dhe mirëmbajtjes së kanalizimit të ujërave atmosferike nuk janë pjesë e kësaj Marrëveshje.

### **Neni 3**

#### **Parimet udhëheqëse të kësaj Marrëveshje**

1. Shërbimet e ujësjellësit dhe kanalizimit të ujërave të ndotura janë veprimtari me interes publik.
2. Shërbimet e ujësjellësit dhe kanalizimit të ujërave të ndotura ofrohen ashtu që të sigurohet zhvillim i qëndrueshëm dhe rritja e vazhdueshme e cilësisë së këtyre shërbimeve.
3. Shërbimet e ujësjellësit dhe kanalizimit të ujërave të ndotura duhet të ofrohen mbi parimin e jodiskriminimit dhe duke zbatuar në tërësi ligjet dhe aktet nënligjore si dhe vendimet e Rregullatorit dhe autoriteteve tjera që kanë kompetenca në bazë të ligjit në fusha të caktuara të veprimtarisë së KRUP-së.
4. Është me rëndësi esenciale që të këtë një bashkëpunim gjithëpërfshirës dhe efektiv ndërmjet Palëve në funksion të shërbimeve të ujësjellësit dhe ujërave të ndotura, e në veçanti për investimet e nevojshme në sistemet e ujësjellësit dhe ujërave të ndotura me qëllim optimizimit të përfitimeve nga këto investime për cilësinë e shërbimeve për qytetarët dhe qëndrueshmërisë së këtyre investimeve.

### **Neni 4**

#### **Rregullimi i Shërbimeve të Ujësjellësit dhe Ujërave të Ndotura**

Palët kanë parasysh se rregullimi i veprimtarisë së KRUP-së i nënshtrohet *Ligjit për Rregullimin e Shërbimeve të Ujit* për zbatimin e të cilit është përgjegjës Rregullatori, ndërkaq çështjet që kanë të bëjnë me pronësinë, qeverisjen korporative, llogaridhënien dhe raportimin i nënshtrohen *Ligjit për Ndërmarrjet Publike*. Çfarëdo konflikti ndërmjet kësaj Marrëveshje dhe këtyre dy ligjeve do të zgjidhet në favor të këtyre ligjeve si dhe ligjeve tjera të aplikueshme në Kosovë.

### **Neni 5**

#### **Obligimet e KRUP sipas kësaj Marrëveshje**

1. Obligimet e KRUP sipas kësaj Marrëveshje përfshijnë:
  - 1.1 të ofrojë shërbimet sipas kësaj Marrëveshje në mënyrë efektive dhe eficiente në pajtim me Standardet e Shërbimit;
  - 1.2 të zhvillojë dhe zbatojë politika dhe procedura operative për ofrimin e shërbimeve sipas kësaj Marrëveshje, duke përfshirë politikën dhe procedurat për (i) lidhjen e konsumatorëve në sistemin e ujësjellësit dhe ujërave të ndotura, (ii) matjen dhe faturimin, (iii) ndërprerjen e shërbimeve dhe (iv) zgjidhjen e ankesave dhe kërkesave të konsumatorëve;

- 1.3 të planifikojë investimet kapitale përmes planeve të veta të biznesit dhe planeve afatgjata të investimeve duke u konsultuar me Komunën dhe duke marrë parasysh propozimet e Komunës;
  - 1.4 të aplikojë tarifën e shërbimit të cilat janë aprovuar nga Rregullatori në pajtim me rregullat dhe metodologjinë e aplikueshme;
  - 1.5 të ndërmarrë të gjitha masat e duhura, për zvogëlimin e humbjeve të ujit;
  - 1.6 t'i vë në dispozicion të Komunës raportet të cilat i dorëzon tek NJPM e NP dhe ARRU për çështjet financiare, operative dhe të cilësisë së shërbimeve në pajtim me obligimet e përcaktuara në bazë të ligjit;
  - 1.7 ta informojë Komunën mbi aktivitetet e KRUP-së në formën dhe shpeshtësinë siç merren vesh Palët;
  - 1.8 të bashkëpunojë ngushtë me komunën dhe autoritetet tjera relevante në rastet e thatësisë kur zvogëlohen apo kur ka paralajmërime që mund të zvogëlohen kapacitetet e burimeve të ujit dhe të koordinojnë veprimet për menaxhimin e situatës;
  - 1.9 të bashkëpunojë ngushtë me komunën dhe autoritetet tjera relevante në rastet e fatkeqësive natyrore dhe fatkeqësive tjera të cilat mund ta rrezikojnë furnizimin me ujë apo cilësinë e ujit;
  - 1.10 me rastin e kryerjes së punimeve në ndërtimin, operimin dhe mirëmbajtjen e sistemit të ujësjellësit të sigurojë paraprakisht pëlqimet dhe lejet komunale në përputhje me ligjin dhe rregulloret komunale dhe t'i kthejë në gjendje të mëparshme sipërfaqet publike nëse të njëjtat dëmtohen gjatë kryerjes së punëve;
  - 1.11 t'i respektojë rregulloret dhe procedurat e komunës me rastin e kryerjes së lidhjeve individuale të konsumatorëve në rrjetin e ujësjellësit dhe kanalizimit;
  - 1.12 t'i zbatojë procedurat dhe rregulloret komunale për dhënie të kushteve për lidhje në sistemin e ujësjellësit dhe kanalizimit në procesin e shqyrtimit dhe dhënies së lejeve ndërtimore për investitorët dhe zhvilluesit e ndërtimeve të reja;
  - 1.13 t'i informojë rregullisht dhe me kohë konsumatorët dhe komunën me të gjitha zhvillimet që lidhen me ofrimin e shërbimeve të ujësjellësit dhe ujërave të ndotura, në veçanti për rastet e ndërprerjes së imponuar të shërbimeve apo në rastet e problemeve me cilësinë e ujit.
  - 1.14 t'i ndërmerrë të gjitha vendimet dhe veprimet e duhura në pajtim me ligjet e aplikueshme që janë të nevojshme për përmbushjen e obligimeve të kësaj Marrëveshje;
2. Obligimet e KRUP sipas kësaj Marrëveshje përmbushen me kusht që:
- 2.1 Komuna i përmbush obligimet e saj sipas kësaj Marrëveshje, dhe

- 2.2 asnjë ligj apo akt nënligjor nuk miratohet që do të bënte ligjërisht të pamundur përmbushjen e obligimeve sipas kësaj Marrëveshje.

## Neni 6

### Obligimet e Komunës sipas kësaj Marrëveshje

1. Obligimet e Komunës sipas kësaj Marrëveshje përfshijnë:
  - 1.1 t'i paguajë me kohë faturat e KRUP për shërbimet që i ofrohen Komunës apo institucioneve tjera që financohen prej buxhetit të saj;
  - 1.2 t'i lejojë KRUP ofrimin e shërbimeve në mënyrë efektive dhe efiçente pa u penguar nga administrata komunale;
  - 1.3 t'i ofrojë me kohë KRUP informata relevante për planifikimin, zhvillimin dhe zgjerimin e Komunës në mënyrë që KRUP t'i shqyrtojë ato informata dhe t'i përfshijë në planet e saj të investimeve kapitale dhe operative;
  - 1.4 t'i transferojë asetet infrastrukturore të ujësjellësit dhe ujërave të ndotura tek KRUP në pajtim me dispozitat e Ligjit për Rregullimin e Shërbimeve të Ujit;
  - 1.5 t'i zbatojë masat për mbrojtjen e zonave të mbrojtura të burimeve të ujit në pajtim me legjislacionin e zbatueshëm, duke përfshirë këto zona në planet e tyre zhvillimore dhe rregulluese si dhe në hartat zonale të komunës, si dhe duke ndërmarrë masat mbrojtëse në pajtim me kompetencat ligjore;
  - 1.6 ta informojë dhe të bashkëpunojë ngushtë me KRUP në të gjitha fazat e investimeve që mund t'i bëjë Komuna në sistemin e ujësjellësit dhe ujërat e ndotura në territorin e vet duke përfshirë: planifikimin, projektimin, mbikqyrjen dhe pranimin teknik të objekteve dhe rrjetit që shërben për shërbimet e ujësjellësit dhe ujëra të zeza;
  - 1.7 ta përfshijë KRUP në procesin e dhënies së pëlqimit në projektin e instalimeve të brendshme të ujësjellësit dhe kanalizimit në mënyrë që të zbatohen kushtet teknike të lidhjes së objekteve të reja në sistemin e ujësjellësit dhe kanalizimit të ujërave të ndotura;
  - 1.8 të rregulloj çështjet ligjore për objektet kolektive, krijimin e këshillave banesore dhe marrjen e përgjegjësisë për të gjitha instalimet e brendshme.
  - 1.9 të bashkëpunojë me KRUP duke ngritur bashkërisht një task forcë për procesin e luftimit të kycjeve ilegale duke aplikuar gjobë mandatorë në pajtim me kuadrin ligjor në fuqi;
  - 1.10 të bashkëpunojë në menaxhimin e situatave të thatësisë dhe fatkeqësive natyrore dhe fatkeqësive tjera në pajtim me kompetencat e veta dhe në pajtim me kuadrin ligjor në fuqi;

- 1.11 ta mbështesë KRUP në procesin e integritit të sistemeve rurale të ujësjellësit nën menaxhimin e KRUP në pajtim me politikën nacionale për sektorin e shërbimeve të ujit;
  - 1.12 të bëjë largimin e taksës komunale për m' (metër gjatësi) aty ku aplikohet, në rast të rehabilitimit të rrjetave ekzistuese të ujësjellësit dhe kanalizimit;
  - 1.13 të bashkëpunojë dhe të kordinojë investimet kapitale të KRUP në mënyrë që të arrihet koordinim me objektivat planifikues të Komunës;
  - 1.14 të planifikojë dhe realizojë investimet kapitale të nevojshme në infrastrukturën ujore (ujësjellës dhe kanalizime) për zonat e reja të ndërtimit, të rris kapacitetet transportuese të linjave konform kërkesave dhe planifikimit.
  - 1.15 duke qenë se rrjetat e kanalizimeve fekale dhe atmosferike në mase të madhe janë të përziera, atëherë palët marrin përsipër që investimet në rrjeta të kombinuara të bëhen mbi parimin e ndarjeve buxhetore të barabarta (50:50) për qëllime të mirëmbajtjes – ndërrimit të linjave.
  - 1.16 të ndërmarrë të gjitha vendimet dhe veprimet e duhura në pajtim me ligjet e aplikueshme që janë të nevojshme për përmbushjen e obligimeve të kësaj Marrëveshje.
2. Obligimet e Komunës sipas kësaj Marrëveshje përmbushen me kusht që:
- 2.1 KRUP i përmbush obligimet e saj sipas kësaj Marrëveshje;
  - 2.2 Asnjë ligj apo akt nënligjor nuk miratohet që do të bënte ligjërish të pamundur përmbushjen e obligimeve sipas kësaj Marrëveshje.

## **Neni 7 Lehtësimet**

1. Për qëllimet e kësaj Marrëveshje dhe gjatë kohëzgjatjes së kësaj Marrëveshje, KRUP i jipet e drejta e shfrytëzimit të hapsirës mbi, nën, përgjatë ose në objekte publike, ura dhe pronë tjetër publike duke përfshirë rrugët, trotualet, autostradat dhe hapësirat e gjelbëruara me qëllim të ndërtimit dhe mirëmbajtjes së tubacioneve nëntokësore, pusetave dhe objektet tjera të ngjajshme që mund të jetë e nevojshme dhe e përshtatshme për ofrimin e shërbimeve sipas kësaj Marrëveshje (që referohet si e " E Drejta e Shfrytëzimit të Pronës Publike").
2. KRUP autorizohet dhe ka të drejtë në shfrytëzimin e pronës publike sipas kësaj Marrëveshje, me kusht që respektimit të sigurisë publike dhe të aspekteve shëndetësore të përcaktuara me ligj dhe rregulloret e Komunës.
3. Gjatë kohëzgjatjes së kësaj Marrëveshje, KRUP duhet që në bashkëpunim me organet kompetente të Komunës dhe në pajtim me ligjet dhe rregulloret e zbatueshme t'i kryejë të gjitha gërmimet nëpër rrugë, trotuare, autostrada dhe sipërfaqe publike në kohën dhe

formën e duhur me sa më pak pengesa për shfrytëzimin publik të asaj prone publike në mënyrën më të përshtatshme për rrethanat e caktuara.

4. Pas kryerjes së punëve të ndërtimit dhe/ose mirëmbajtjes së sistemit të ujësjellësit në sipërfaqe publike, KRUP duhet të bëjë përpjekje maksimale për kthimin e asaj prone publike në gjendjen që ka pasur para kryerjes së gërmimit.

## **Neni 8**

### **Kërkesat ligjore dhe ndihma nga komuna**

1. Komuna nuk do të shkaktojë apo mbështesë miratimin, zbatimin apo aplikimin e çfarëdo kërkesë ligjore ndaj KRUP-së e cila nuk ka ekzistuar në datën e nënshkrimit të kësaj Marrëveshje.
2. Komuna do të bëjë përpjekje të arësyeshme për ta ndihmuar KRUP për marrjen nga Komuna dhe departamentet e Komunës autorizimet, lejet e ndërtimit, lejet tjera, pëlqimet, aprovimet, certifikatat dhe dokumentet tjera dhe do të ndërmerr veprime të duhura sipas nevojës ose në pajtim me ligjin ose rregulloret komunale me qëllim që t'ia lehtësojë KRUP operimin, mirëmbajtjen dhe zgjerimin e shërbimeve sipas kësaj Marrëveshje, me kusht që për një gjë të tillë të mos kërkohet që Komuna të bëjë aplikacion ose kërkesë në emër të KRUP.
3. Komuna do të bëjë përpjekje të arësyeshme për ta ndihmuar KRUP për marrjen e shpejtë të çfarëdo leje, pëlqimi dhe të drejte të shfrytëzimit të pronës private, apo të dokumenteve tjera ose veprimeve të nevojshme që kërkohen nga cilido organ zyrtar i Kosovës në lidhje me operimin, mirëmbajtjen ose zgjerimin e shërbimeve sipas kësaj Marrëveshje, me kusht që për një gjë të tillë të mos kërkohet që Komuna të bëjë aplikacion ose kërkesë në emër të KRUP.
4. Komuna do të ofrojë ndihmën e vet për zbatimin e udhëzimeve dhe urdhëresave për kursimin e ujit sipas kërkesave të KRUP.

## **Neni 9**

### **Tarifat për shërbimet e ofruara**

1. Tarifat me të cilat KRUP faturon për shërbimet e ofruara aprovohen nga Rregullatori me nxjerrjen e urdhëresës tarifore dhe KRUP është e obliguar që të njëjtat t'i publikojë në mjetet e informimit publik.
2. Për çfarëdo shërbimi që mund të kërkohet nga Komuna e që nuk është përfshirë me urdhëresë tarifore të aprovuar nga Rregullatori, përfshirë këtu mirëmbajtjen e kanalizimit të ujërave atmosferike, duhet që Komuna dhe KRUP të nënshkruajnë kontratë me shkrim duke specifikuar çmimin, sasinë dhe vlerën totale të shërbimit.
3. Uji i pijes që përdoret nga Njësia e Zjarrëfikësve për fikjen e zjarrit do të regjistrohet, por nuk do të faturohet nga KRUP.



### **Neni 10** **Ndërprerja e shërbimit për komunën**

1. Komuna dhe departamentet e saj do t'i nënshtrohen të drejtës së KRUP për ndërprerjen e shërbimit në rast se nuk paguajnë faturat e pagueshme në afatin e paraparë në pajtim me ligjin.
2. Shkollat, departamenti i zjarrfikësve, spitalet dhe institucionet tjera shëndetësore nuk i nënshtrohen kësaj të drejte.

### **Neni 11** **Mospërbushja nga Palët e obligimeve të kësaj Marrëveshje**

1. Në rast se ndonjëra prej Palëve vlerëson se Pala tjetër nuk i ka pëmbushur obligimet e kësaj Marrëveshje, do ta adresojë çështjen tek Rregullatori i cili do ta shqyrtojë çështjen në pajtim e Ligjin për Rregullimin e Shërbimeve të Ujit dhe aktet nënligjore të miratuara në pajtim me këtë Ligj.
2. Nuk do të konsiderohet se ka pasur mospërbushje të obligimeve nëse Pala ka qenë e penguar të përbushi ndonjë nga obligimet e saj sipas kësaj Marrëveshje për shkak të ngjarjes së Forcës Madhore.

### **Neni 12** **Ndashmëria**

Të gjitha klauzolat e kësaj Marrëveshje janë të veçanta dhe të ndara, dhe nëse ndonjë nga këto klauzola konsiderohet e paligjshme, anulohet ose bëhet e pazbatueshme, e njëjta nuk do këtë ndikim në validitetin, legalitetin ose zbatueshmërinë e klauzolave tjera.

### **Neni 13** **Ligji i aplikueshëm**

Kjo Marrëveshje interpretohet dhe qeveriset sipas ligjeve të zbatueshme në Kosovë.

### **Neni 14** **Zgjidhja e mosmarrëveshjeve**

1. Në rast të mosmarrëveshjeve, kontradiktave apo ankesave që mund të dalin nga ose në lidhje me këtë Marrëveshje, Palët do të bëjnë përpjekje që të zgjidhin mosmarrëveshjet në mënyrë miqësore.
2. Kur mosmarrëveshjet nuk mund të zgjidhen në mënyrë miqësore dhe në baza të vullnetit të mirë, ato do t'i nënshtrohen shqyrtimit nga gjykata me juridiksion kompetent në Kosovë.

### Neni 15 Kohëzgjatja

Kjo Marrëveshje hyn në fuqi në Datën Efektive dhe do të këtë kohëzgjatje fillestare prej katër (4) vitesh prej dates së hyrjes në fuqi. Pas skadimit të këtij afati, Marrëveshja përtërihet automatikisht çdo katër (4) vjet, përveç nëse njëra Palë e njofton me shkrim Palën tjetër se dëshiron ta rishikojë Marrëveshjen. Njoftimi në këtë rast duhet të bëhet së paku tre (3) muaj para përfundimit të afatit të skadimit të Marrëveshjes. Me hyrjen në fuqi të kësaj Marrëveshje, shfuqizohet çdo Marrëveshje paraprake bashkëpunimi në mes të Komunës dhe KRUP-së për shërbimet e ujësjellësit dhe ujërave të ndotura.

### Neni 16 Modifikimi i marrëveshjes

Modifikimi i kësaj Marrëveshje mund të bëhet me shkrim, me nënshkrim të të dyja Palëve.

Për dhe në emër të Komunës së Lipjanit:

Z. Imri Ahmeti

Kryetar i Komunës



Datë: 10/06/2022

Për dhe në emër të KUR Prishtina SHA

Z. Sokol Khafa

UD. Kryeshf Ekzekutiv i KRUP



Datë: 10/06/2022